

Inissialiornermut, illunut ataatsimoorussanut, illuliassanut il.il. tapersiissuteqartarnej pillugu Inatsisartut peqqussutaat nr. 11, 19. november 2007-imeersumi kapitali 4-ip allanngortinneqarnissaanik Naalakkersuisut sulissuteqaqqullugit peqquneqarnissaannik Inatsisartut aalajangiiffigisassaattut siunnersuut, taamaaliornikkut illuutit ataasiakkaat niuernerminaleqassusaannut naleqqussaasoqarnissaa qulakkeerneqarsinnaaqqullugu.

(Inatsisartuni ilaasortat Knud Kristiansen aamma Gerhardt Petersen, Atassut)

Akissuteqaat

(Ineqarnermut Naalakkersuisoq)

Siullermeerneqarnera

Kapitali 4 najoqqutaralugu taarsigassarsiat sinneri illuutit ataasiakkaat niuernerminaleqassusianut naleqqussarneqarsinnaaqqullugit Naalakkersuisut sulissuteqaqqullugit peqquneqarnissaannik Inatsisartut aalajangiiffigisassaannik Inatsisartuni ilaasortat Knud Kristiansen aamma Gerhardt Petersen, Atassut, siunnersuummik saqqummiussipput.

Namminersorlutik Oqartussat illuutinik taarsigassarsimasut utertitaannik arleriarlutik taperseeriaaseq najoqqutaralugu piginnittunut nutaanut tunisaqartarsimapput. Pisuni taakkunani tunisinermi akigitinneqartut illuutit ataasiakkaat teknikkikkut aningaasaqarnikkullu nalinga aallaavigalugu annertussusilerneqartarput, tassa imaappoq illuutit tunineqarnerini akigitinneqartut aalajangerneqartarput illuutip sanaartornermi atortuisa naleqassusiat najoqqutaralugu, tassani nungullarsimanerisa, pisoqalisimanerisa aammalu aserfallatsaaliuinissamik sumiginnaasimanerit kingunerilannaatigineqartarlutik. Assersuutigiinnarlugu illuut illu type 67-it Napasumiikkuni, Paamiuniikkuni imaluunniit Qaqortumiikkuni assigiimmik naleqartinneqassaaq. Tassunga pissutaavoq teknikkikkut aningaasaqarnikkullu nalileeriaatsimi illup inissisimanera, kusanassusia isikkivaluunniit qissiminneqarneq ajoramik.

Niuernikkut akigitinneqartut najoqqutaralugit illup taamaattup, tassa BSU type 67-ip nalinga qanoq annertutigissanersoq nassaarissagaanni apeqqutaaneruvoq illu sumiinnersoq, qanoq kusanartiginnersoq aammalu isikkivia qanoq innersoq. Illup sanaartorneqarnermini atortuisa pitsaassusaat nalileeriaatsimi tassani annertunerusumik najoqqutarineqarneq ajorluni.

Taamaammat BSU type 67-ip Qaqortumiittup niuernikkut nalinga qaffasinnerussaaq illunut assinginut Paamiuniittumut Napasumiittumullu sanilliullugu. Tassa BSU-mi periarfissat najoqqutaralugit illuutillit akiitsuisa sinnerisa niuernikkut nalileeriaaseq najoqqutaralugu naleqqussarneqarnissaanni illuutit sumiiffimmi sananeqarfigisimasaanut naleqqussarneqassapput. Tamanna imatut malitseqassaaq, nunaqarfinni avinngarusimasunilu BSU aqqutigalugu illuliaasimasut piginnittuisa akiitsuisa sinnerisa naleqqussarneqarnerisigut taakku akiitsui appariaateqassapput, paarlattuanillu illoqarfinni anginerusuni naleqassusaat nikingaarnaviangitsut, taakkunani illut niuernikkut naleqassusaat annertummata.

2014-imi ineqarnermi suliassaqarfik pillugu misissuisoqartussaavoq misissueqqissaartoqartussaallunilu, tassungalu inissialiornermut tapersiissuteqartarnej ilaatinneqassaaq. Inissialiornermut tapersiissuteqartarnermi kapitali 4 naapertorlugu

akiitsut sinnerisa illut, Namminersorlutik Oqartussanit tuneqqinneqartut niuernermi nalinginut naleqqussarneqarnissaannut Naalakkersuisut isumaqataapput siunnersuummullu tapersiillutik. Tamatumunnga atatillugu akiitsut niuernermi naliusumut appartinneqassappata Namminersorlutik Oqartussat suli BSU-mit taarsigassarsilluni illulianik utertitsinissamut pisussaatitaassanersut immikkut misissuiffigineqarnissaa pisariaqassaaq.

Taamatut oqaaseqarlunga neriuppunga aalajangiiffigisassatut siunnersuut oqallisigilluarumaaripput, aammalu Inatsisartuni ilaasortat pilersitsiviulluartussanik siunnersuuteqarumaartut.